



Iesus avec Pierre, Iacques & Iean, est au jardin des Oliues priant Dieu son Pere, qui enuoye un Ange pour le consoler.

QUAND Iesus & ses Apostres eurent fait la Pasque, & dit l'Hymne, il s'en allerent en la montagne des Oliues passans le torent de Cedron. Lors Iesus leur dist, Vous tous serez scandalisez en moy cette nuit : car il est écrit, Je frapperay le Pasteur, & les brebis du troupeau seront esparfes, Pierre répondant, luy dist, Encore que tous fussent scandalisez en toy, ie ne le feray iamais, & ne te laisseray point. Iesus luy dist, En verité ie te dis qu'aujourd'huy en cette nuit auant que le cocq chante deux fois, tu me renieras trois fois. Mais Pierre luy dist, Quand il me faudroit mourir avec toy, ie ne te renieray point, & autant en dirent tous les Disciples. Or Iesus estant au iardin des Oliues, & ayant pris avec luy seulement Pierre, Iacques & Iean, commença à se contrister & espouuanter, & estre en angoisse : Et alors il leur dist : Mon ame est triste iusques à la mort : demeurez icy, & veillez avec moy, & priez, afin que n'entriez en tentation, & s'esloigna d'eux enuiron d'un ject de pierre, & s'agenouillant se ietta sur sa face en terre, & pria Dieu son Pere, qu'il luy transporta ce Calice : toutesfois que sa volonté fust faite, non pas la sienne. Et l'Ange du Ciel s'apparut, qui le consola & reconforta.

S. Matthieu Chap. 26. S. Marc Chap. 14. S. Luc Chap. 22. S. Iean Chap. 18.